

Script Of Evening Gojri News Bulletin 03 June 2024 at 1700 Hrs

ایوننگ گو جری نیو ز بلیٹن مو رخہ 03 جون 2024

یوہ آکا شوانی جموں ہے مشرف عظیم تے خادم حسین تیں خبر سنو۔ پہلاں خاص خاص خبر۔

- * 1- بھارت نے دُنیا مانہ لوک سبھا انتخابات مانہ 64 عشاریہ 2 کروڑ ووٹراں غی شراکت داری سنگ اک عالمی ریکارڈ قائم کیو ہے۔ جس مانہ جموں کشمیر مانہ پچھلا 4 دہائیاں توں لوک سبھا انتخابات مانہ ووٹراں غی شرح زیا دہ رہی ہے۔
- * 2- لوک سبھا انتخابات غا ووٹاں غی گنتی با رے تمام انتظامات کر لیا گیا ہیں۔
- * 3- مُلک غا دوجا حصاں غی طرح ووٹاں غی گنتی توں اک تہاڑا پہلیں جموں تے اُدھم پور لوک سبھا نشستیاں غا ووٹاں غی گنتی آلا مرکزیاں ور 3 سطحی حفاظتی انتظامات کر لیا گیا ہیں۔

* 4- تے وزیر اعظم نریندر مودی نے کہیو ہے جے 21 ویں صدی غی دُنیا بھارت نانہ بہت ساری اُمیدیاں سنگ دیکھ رہی ہے۔

خبریاں غی تفصیل نال پہلاں خادم حسین۔

CEC Briefing

چیف الیکشن کمشنر راجیو کمار نے کہیو ہے جے لوک سبھا چناؤ مانہ بھارت نے 64 عشاریہ 2 کروڑ ووٹراں غی شراکت سنگ اک عالمی ریکارڈ قائم کیو ہے۔ اج نویں دہلی مانہ اخباری نمائنداں نال گل کرتاں واں اُنہاں نے کہیو جے بھارتی ووٹراں غی تعداد جی 7 مُلکاں غا تمام ووٹراں توں ڈھیڑ گناہ زیا دہ ہے۔ اُنہاں نے کہیو جے اس چناؤ مانہ 31 عشاریہ 2 کروڑ کالسرپاں نے حصولیو ہے اور یاہ تعداد پورے دُنیا مانہ سب تیں زیا دہ ہے۔ اُنہاں نے کہیو جے اس چناؤ مانہ 39 ضمنی چناؤ کیا گیا جھیڑا 2019 مانہ 540 تھا۔ اُنہاں نے کہیو جے اس چناؤ مانہ 68 ہزار تیں زیادہ نگران جماعت اور ڈھیڑ کروڑ پولیننگ اور مقامی عملو تعینات کیا گیا تھا اور چناؤ غے دوران تشدد غو کوئی وی بڑو واقعو پیش نہیں آيو۔ اُنہاں نے کہیو جے چناؤ غے دوران منشیا ت اور شراب سمیت 10 ہزار کروڑ غی نقدی برآمد کی گئی ہے جد کہ 2019 مانہ چناؤ غے دوران معیاری ضابطہ اخلاق غی 495 شکایات وچوں 90 فیصد تیں زیا دہ نانہ ختم کیو گیو۔ ووٹاں غی گنتی با رے گل کرتاں واں اُنہاں نے کہیو جے گنتی مرکزیاں ور تکنیکی آلا ت سنگ بہتر حفاظتی انتظام کیا گیا ہیں۔ جناب کمار نے کہیو جے حزب اختلاف غا تمام مطالبات ور غور کیو گیو ہے۔ کانگریس لیڈر جے رام رمیش نے الزام لا یوتھو جے مرکزی وزیر داخلہ امت شاہ نے ریٹرننگ افسراں نانہ بلايو تھو۔ اس سلسلہ مانہ اُنہاں نے کہیو جے یاہ اک افواہ ہے۔ اس تیں علا وہ جموں کشمیر مانہ اسمبلی چناؤ کیا گیا اک سوال غا جواب مانہ اُنہاں نے کہیو جے جموں کشمیر مانہ جلدی کمیشن غی طرفوں چناؤ غو عمل شروع کیو جائے گو۔

LS Counting Vote

لوک سبھا چناؤ غی گنتی وے گی اور اس سلسلہ مانہ تمام انتظامات مکمل کر لیا گیا ہیں۔ اور کل آندھرا پردیش تے اڑیشہ غا اسمبلی چناؤ غی گنتی تے اسمبلی حلقاں غا ضمنی چناؤ غی گنتی وے گی۔ ووٹاں کی گنتی غو عمل سویرے 8 بجے تیں شروع وے گو۔

واضع رہے جسے اس سال گالوک سبھا چناؤ 19 اپریل چناؤ کمیشن نے کہیو ہے جسے گنتی
غا نتائج بھارتی چناؤ کمیشن کی ویب سائٹ
results.eci.gov.in

اور ووٹر ہیلپ لائن ایپ ور موجود ہیں گا۔ کمیشن کی طرفوں کہیو گیو ہے جسے
ریٹرننگ افسراں اور ایجنٹاں واسطے اک کتابچو وی جاری کیو گیو ہے جہیڑو کمیشن
کی ویب سائٹ ور دستیاب ہے۔ اور گنتی غا عمل ای وی ایمز اور وی وی پیٹرز بارے
کمیشن کی ویب سائٹ ور پہلاں ہی مفصل ہدایت جاری کی گئی ہیں۔

RO Meets

ریٹرننگ افسر جموں پارلیمانی حلقہ تے ضلع میجسٹریٹ جموں سچن کمار ویشے نے
لوک سبھا غا امیدواراں تے اُن کا ایجنٹاں سنگ آج اک اہم میٹنگ کی ہے۔ اسے دوران
ایس ایس پی ڈاکٹر ونود کمار وی موجود تھا۔ جن نے حفاظتی بندوبست بارے یقین دہانی
کرائی تے کہیو ہے وے ووٹاں کی گنتی کے دوران کسے وی اُن بنے امید نہ
رکھیں۔ واضع رہے جسے اس حلقہ کی ووٹاں کی گنتی گو رنمنٹ پالیٹیکنک کالج وکرم چوک
تے ایم اے ایم کالج مانہ پلک 4 جون نانہہ منعقد وے گی۔ اس سلسلہ مانہہ باقی انتظامات
ور وی تفصیلی جانکاری دتی۔ ریٹرننگ افسر نے اس ور لو کہلی جسے دفعہ 144 تے مثالی
ضابطہ اخلاق وی ووٹاں کی گنتی آلی تہاڑے لا گو رہے گو۔ اس تیں علاوہ ضلع چناؤ افسر
کی اجازت تیں بنا کسے وی جشن یاہ پٹاخا پھوڑنا ووٹاں کی گنتی آلا احاطہ مانہہ منع
ہے۔

Security Arrangement Kashmir

وادی کشمیر مانہہ لوک سبھا کی 3 نشستیں کی گنتی کے مد نظر وادی مانہہ حفاظت غا
انتظامات مضبوط کر دتا گیا ہیں۔ عہدیداراں نے مطابق سرینگر با رہمولہ اور اننت ناگ مانہہ
گنتی مرکزوں ور 3 درجاں ور مشتمل حفاظتی انتظامات کیا گیا ہیں تا جسے مذکورہ مراکز
ور اجازت توں بغیر کوئی وی شخص داخل نہ ہو سکے۔ واضع رہے جسے اس سلسلہ مانہہ
حلقاں غا ریٹرننگ افسراں نے کمیشن کی طرفوں تجویز کردہ گنتی غا عمل اور معیاری
طریقہ کار توں واقف کران کی خاطر ہر اک حلقہ غا امیدوار اور ایجنٹاں سنگ میٹنگ کی۔
اس موقعہ ور ریٹرننگ افسراں نے میٹنگ مانہہ شرکت کرن آلاں نانہہ گنتی کا طریقہ کار
ای وی ایمز، وی وی پیٹ، ای ٹی بی پی ایس بارے جانکاری دتی۔ وادی کشمیر کی
3 نشستیں ور 66 امیدواراں نے چناؤ مانہہ حصولیو ہے۔ جن مانہہ پی ڈی پی کی صدر
محبوبہ مفتی، نیشنل کانفرنس غا نائب صدر عمر عبداللہ، جموں کشمیر پیپلز کانفرنس غا
سربراہ سجاد غنی لون وغیرہ شامل ہیں۔

Sonia Exit Poll

کانگریس پارٹی کی سابقہ صدر سونیا گاندھی نے امید جتاتاں واں کہیو ہے جسے لوک
سبھا رائے شماری کا نتیجہ پورا طریقہ نال ایکزٹ پول کے برعکس ہیں گا۔ وے میڈیا کی
طرفوں پچھیا گیا اک سوال جو جواب دے رہیں تھیں۔ جس مانہہ بہت سارا ایکزٹ پول مانہہ
بی جسے پی کی قیادت آلی این ڈی اے نانہہ لوک سبھا چناؤ مانہہ فتح یاب قرار دتو گیو
ہے۔ اس تیں پہلاں سونیا گاندھی نے تامل ناڈو غا سابقہ وزیر اعلیٰ ایم کرشنا نیدھی غا یوم
پیدائش ور اُن نانہہ خراج عقیدت پیش کی۔ اس سلسلہ مانہہ بکھ بکھ حزب اختلاف گالیڈاراں

جن مانہ ڈی ایم کے غا ٹی آر بالو، سی پی آئی ایم غا جنرل سیکریٹری سینا رام یچوری
تے نیشنل کا نفرنس غا لیڈر فاروق عبداللہ نے وی انہاں نانہہ خراج عقیدت پیش کی۔

BJP Meeting

لوک سبھا چناؤ غی گنتی توں پہلاں اج بی جے پی غا صدر جے پی نڈانے اک
میٹنگ غو انعقاد کر غے پارٹی لیڈراں سنگ پارٹی غی تیاریاں بارے گل کی۔ اس
موقعہ ور وزیر داخلہ اور بی جے پی غا سنئیر لیڈر امت شاہ پارٹی غا جنرل سیکریٹری
بی ایل سنتوش اور ونودتا وڈے وی ات موجو دتھا۔ اس موقع ور اخباری نمائنداں سنگ
گل کرتاں واں ونودتا وڈے نے کہیو جے تمام لیڈراں نے ووٹاں غی گنتی بارے پارٹی غی
تیاریاں ور غور کیو ہے۔

یہ خبر تم آکا شوانی جموں تیں سن رہیا ہیں خبراں غا باقی حصہ نال مشرف اعظم۔

PM Bharat Thought

وزیر اعظم نریندر مو دی نے کہیو ہے جے 21 وی صدر غی دُنیا بھارت نانہہ بہت
ساری امید اں سنگ دیکھ رہی ہے۔ اور بھارت غو نظامی ماڈل پوری دُنیا غا کئیں مُلکاں
واسطے اک مثال بن گیو ہے۔ اک خط غے ذریعے مُلک غا لوکاں سنگ اپنا خیالات غو اظہا
ر کرتاں واں انہاں نے کہیو جے اج پوری دُنیا مانہہ بھارت غا جدید طرز عمل، بہتر
نظام تے متاثر کن اضلاع اور بلاکاں بارے گل کی جا رہی ہے۔ انہاں نے کہیو جے صرف
10 بہراں مانہہ 25 کروڑ لوکاں نانہہ غریبی غی سطح تیں اوپر لیانو اک مثال ہے۔ انہاں نے
کہیو جے غریباں نانہہ خود کفیل بنان بارے سرکار غا جتناں نے پوری دُنیا نانہہ متاثر کیو
ہے۔ اس موقع ور وزیر اعظم نے 4 سمتاں مانہہ کم کرن غی ضرورت ور زور دتو جن
مانہہ رفتار، معیار، دائرہ کار تے پیمانوں شامل ہیں۔ انہاں نے کہیو جے جی 20 غی کامیابی
توں بعد پوری دُنیا بھارت واسطے اک اہم کردار غو تصور کر رہی ہے۔ اور اج بھارت نانہہ
جنوبی ممالک غی اک اہم آواز غا طور ور تسلیم کیو جا رہیو ہے۔ اور بھارت غی پہل ور
افریقی یونین جی ٹوانٹی غو حصو بن گیو ہے۔ انہاں نے یہ خیالات رواں مہینہ غی 1 تا
ریخ نانہہ کنیا کماری توں دہلی واپس آن غی پرواز غے دوران لکھیا۔ اور کہیو جے کنیا
کماری اتفاق غو پیغام دے۔

Nitsh Modi Meet

بہار غا وزیر اعلیٰ تے جے ڈی یو غا صدر نیتیش کمار نے وزیر اعظم نریندر مو دی غی
رہائش گاہ ور اُن نال ملاقات کی ہے۔ یہ ملاقات پلک لوک سبھا چناؤ غا ووٹاں گی گنتی
غے مد نظر کی گئی ہے۔

Encounter JK

اج جنوبی کشمیر غا ضلع پلوامہ غا گراں نہمہ مانہہ دہشت گرداں سنگ ٹاکرا مانہہ 2 دہشت
گرد مار دتا گیا ہیں۔ سرکاری ذرائع غے مطابق نہمہ کاکپورہ گراں مانہہ دہشت گرداں با
رے اک سو ملن توں بعد ٹاکرو شروع ہو گیوتھوویوہ ٹاکرو اس ویلے ہوؤ جد پلک لوک سبھا
انتخابات غا ووٹاں غی گنتی ہو رہی ہے۔ اس ضمن مانہہ ٹاکرا آلی جگہ تیں 2 لاش برآمد
کی گئی ہیں جد کہ مزید تفصیل غی اجوں اڑیک ہے۔

NHAI Toll Plaza

بھارتیہ قومی شاہراہ بارے اتھارٹی نے مُلک پھر مانہ ٹول ٹیکس مانہ اوسطاً 5 فیصد بڑھوتری کر دتی ہے۔ اک عہدیدار غے مطابق صارفین واسطے بدھائی گئی یاہ فیس اج توں لاگو ہو جائے گی۔ واضع رہ جے مُلک پھر مانہ وسیع پیمانہ ور تقریباً 9 سو توں متا ٹول پلازہ قائم ہیں۔

KVK Reasi

اج کریشی وگیان کیندر ریا سی غی طرفوں ضلع ریا سی غا کرواہ گراں مانہ پھل تے سبزی غا ڈبہ بند کرن بارے اک تربیتی پروگرام غو انعقاد کیو گیو۔ اس موقعہ ور پروگرام مانہ بڑی تعداد مانہ کالسری اور نوجوان کساناں نے حصولیو۔ پروگرام غو انعقاد آریا یعنی نوجواناں نانہہ زراعت مانہہ راغب کرن بارے پروجیکٹ غے تحت کیو گیو ہے۔ اس موقع ور پروجیکٹ بارے گل کرتاں واں کے وی کے غا سربراہ اور سائینسدان ڈاکٹر بنسی لال نے اس طرح کہیو۔۔۔ بانٹ۔۔۔

Missing Body

اک سلیج مین غی لاش نانہہ اج سندھ نالہ توں تلاش کر لیو گیو ہے۔ سرکاری ذرائع غے مطابق یوہ سلیج مین گذشتہ روز توں لا پتہ تھو جد تھاجواس گلشیر توں برف غی مانی ٹٹ غے سونمرگ غا علاقہ مانہہ پئی تھی۔ جس غا نتیجہ مانہہ اُسے دوران دو سیاحاں نانہہ موقعہ تیں بچالیو تھو۔ اس تیں علاوہ ذرائع غے مطابق سلیج مین غا سندھ نالہ مانہہ تہن تیں بعد جلد ہ بچاؤ کا روائی شروع کر دتی گئی تھیں۔ اس سلسلہ ماہہ کا فی مشکلات توں بعد سلیج مین غی لاش غی شناخت بطور منظور احمد خان ولد محمد یوسف حقنار گنڈ غا بسنیک غا طور ور کی گئی ہے۔

اس غے نال ہی خبراں غو یوہ بلیٹن ختم ہوؤ۔